

# REKA MBATURE RWARUKUNDO

Placide KALISA

Mbe bahanzi ko munsembura  
Ngo nze mbasange twisihinge  
Twange cyane bya birura  
Byadutwaye imitima yera  
Byo gatsindwa na Ryangombe  
N'impenebere Nyirakajumba.

Reka mbature rwa rukundo  
Ruzira uruhando rwo mw'isumo  
Imwe yatwaye bene data  
Tukaba twikubye nk'umurembe  
Wazize izuba rya Nyakanga.

Reka mbature rwa rukundo  
Nabizeza guhora nshoza  
Nshaka ubwungo bwa Gihanga  
Ngo bajye barengana n'irirenga  
Inkoko zabo zizahuhe  
Bajye barangwa n'iyi funi  
Bazayivuruganye ay'umuyenzi  
Imboni zabo ziyikwize.

Reba mbature rwa rukundo  
Turuhe cyane Hakizayezu  
Ari we Vedaste w'umuhanzi  
Dore iyi nganzo yarayigenze  
Ati nimuhange mube abaganga

Sebahinzi ntababashe  
Kuko umudigi urimo ibijumba  
Iyo awukuruye uraforoka  
Akaba yagutera guhindana.

Baramwishe bo kamobwa.  
None Indatwa namwe Inkindi,  
Nimumucyeze ni ingabo icyeye  
Ibigwi yatanze tubiririmbe  
Kabone n'ejo tunarikeshe  
Sebahinzi yikubure  
Asange intungwa zo mu muyonga

Azazicange na za nturo  
Azaziryane na za ntozo  
Kuko ubu byose byarahire  
Ahorane ubwaku bwazisaze.

Placide Kalisa